

聖宋名賢五百家播芳大全文粹卷二十六

賀啓

賀正

賀定帥寶文正啓

張欽夫

伏以魯史書元謹天地化生之始義文畫秦貴聖賢
道長之初伏惟某官才茂天資學探經奧遇會光
華之旦徊翔侍從之班茲暫委於兵藩宜亟膺於召
節履是元正之吉茂迎神貺之多某阻奉慶觴第深
馳詠

賀太守龍圖正啓

吳必光

伏以日舍星虛律回太簇漢舉三朝之慶魯開五始之祥伏惟某官智識敏強器能寬裕出值文明之會顯升侍從之班茲暫委於佉藩宜亟膺于召節履茲元序倍擁純禧某阻致慶于壽觴第馳誠於賓廡其為頌詠罔喻勤倦

賀太守待制正啓

程子山

伏審堯歷閏端夏正謹始適三陽之並進宜百福之叢來伏惟某官忠結主知德諧人望總百城之師律深藉沉謀職列聖之奎文久聯法從履是元正之序順迎神貺之休某拜晤未期詠瞻無斃勉祈珍護

密副眷懷

賀都督正啓

張德美

麟經謹始大一統于天王鳳歷推元謹三微於君德方仁主行慶而施惠且王師振旅而策勲咸與維新罔不率俾恭惟某官量廣滄海德尊泰山仁及海隅德高天下威足以振讐醜虜功足以建立中興當正月之始和有東方之入律取泰於否已克相天地之宜申命行師將盡復文武之士乘三陽之方長扈八駿以言還捷書塞於置郵歡聲洋溢於奏凱洛陽宮殿覺寒盡而春生故國山河割割天開而地闢某雖望

雲而有路欲駕馬以無車織草何功尚想舊年之雨
露昆虫微命亦思起蟄之雷霆

賀總領正啓

毛伯穎

正月之吉始和兩儀交泰人道所貴曰福百順同升
恭惟 某官迪德純誠凝姿溫厚偉量吞乎雲澤和
氣藹于陽春卿月呈祥夙被九重之眷倚使星臨次
允為六路之光華履茲令辰倍擁殊祉某阻趨慶壽
第切馳情輒布緘滕益增歡于賀履行觀綸綍當進
擢於秉鈞祝頌之私敷陳罔既

賀帥司正啓

王叔子

伏以璿璣正始嗣更一歲之端玉燭推移蒞達三陽
之統伏惟 某官謀猷闕遠器識淵深直道致身為
士林之表式精忠許國拱廟祐之晏寧劇易一于誠
忱出處安於義分况茲吉日宜集善祥某阻致慶於
壽觴第馳情于賓廡其為禱頌罔既敷陳

賀帥司正啓

楊祐甫

伏以益取起歲上日標年屬林運之布新宜佳辰之
薦祉恭惟 某官才兼文武德備忠嘉學術冠映士
林謨謀輔相王室睿懷倚任固有異于陪京碩福繁
昌宜亟還于元弼順履元正之吉密迎神貺之休某

屬守藩條阻獻壽筭永言祈頌曷罄喻言

賀漕使正啓

宋祈公

杓連孟陬交三陽而為泰灰飛太簇滋一氣以回春
恭惟 某官明允篤誠博大靜重鍾西南之秀氣歷
中外之要津輓粟江湖善最已高於諸路垂紳廊廟
迅除佇聽於匪朝履茲令辰倍擁殊祉某阻趨薦壽
第切馳情輒布緘滕益增歡于賀履行觀綸綍當近
擢于秉鈞祝頌之私敷陳罔既

賀漕使正啓

李吉甫

竊以天統開端王正謹始稱壽觴于栢葉賡慶福於

椒花恭惟 某官德粹而剛識明以恕與學藹騰于
僉論駿功簡在于淵衷未還扈從之華班尚屈翰將
之重寄方三陽之明進朋宜百祿之具膺某蒙託恩麻
間遙賓庶旅進莫投于刺謁驛馳敢摯于書滕

賀憲使正啓

吳有光

簇律飛灰交三陽而為泰寅杓連位肇一氣以回春
恭惟 某官學富儒宗才全王佐鯁亮素高于臺閣
忠嘉自結于冕旒總按邦刑允重平反之寄暫兼帥
閩更資屏翰之方履茲令辰倍擁殊祉某阻趨薦壽
第切馳情

賀監司正啓

周子充

經書五始曆謹三朝物與歲以更新人自天而錫祉
伏惟 某官望隆鎮俗德厚禋躬著微譽于熙朝倚
劇權于要路迪乃心之勤勩底所部之澄清佇懋勞
庸入躋膺仕屬茲元吉宜享休嘉某莫階布頌之誠
第切嚮風之想

賀監司正啓

王晦叔

天地既交在時為泰君子寢長與物偕通恭惟 某
官綽著吏能雅為國器順履吉亨之會茂迎福祿之
來佇被褒陞徑居華要莫違稱壽但極馳誠祝頌之

深喻言奚既

賀太守正啓

宋文淵

祥開玉曆謹五始于春王肇序銅儀遵三陽于夏正
履端伊始介福尤多恭惟 某官道與時隆德隨日
進暫爾蕃宣之借重行將廊廟以登庸賢業對時神
明薦祉某尚拘小壘莫造崇墀被和氣於江干欣逢
穀旦瞻賀塵于表著阻奉椒觴

賀太守正啓

王介甫

獻歲發春自天降祉方竦瞻於治所阻交致于壽觴
伏以 某官德履端方才猷敏妙久鎮臨于邊劇已

茂著于勞能諒因正始之辰倍享宜新之祐某首承
榮翰第切感悰方履濡寒冀加珍護

賀太守正啓

李仲信

伏以五始書元魯史重王春之首六爻交泰義經貴
乾道之亨恭惟某官材茂天資學探道蘊值此勛
華之盛旦久更西北之要權暫專委于价藩宜亟膺
于召節履是元正之序倍迎神貺之休某阻奉慶儀
第深馳想

賀太守正啓

孫正之

魯史書元基于陽化義爻畫泰慶于大來伏以某
官簡在上心望隆時棟蘊臯夔之賢業富丙魏之周
才協贊機衡樽俎勝折衝之筭從容外守士民馳仰
德之誠聊倚任于帥藩即迅膺于召節履茲昌序茂
擁繁禧某阻致慶于壽觴第馳誠于賓廡

賀太守正啓

夏正肇建當三陽升進之初鄒律推元寔四序履端
之始春已同于萬室慶遂決于輿心恭惟某官直
道事君深忠許國姑屈專城之任行膺大柄之權適
會佳辰宜膺殊祉賜環天陛式邁其歸正位從班指
日而俟某屬拘外邑阻造台階稱觴莫遂于鳧趨貢

續敢申于燕賀微官下士方依東壁之光冷灰枯楊
更借熙春之煖

賀太守正啓

陳阜卿

一氣回春三陽交泰蠢然品物俱有向榮之心卓爾
仁賢豈無為善之福恭惟 某官溫恭毓性謙必持
身暫鎮撫於雄藩未究施于遠業茂迎穀旦即奉召
除某乘障非才善鄰是賴阻奉一觴之壽輒修尺牘
之書頌詠于中敷宣罔既

賀太守正啓

李守真

人元開統雞旦更端寅乍建于斗杓律初回于太簇
恭惟 某官受天間氣為世偉人早膺睿主之知專
任候藩之政想茂膺於正旦宜倍擁于殊休某幸托
恩闕俯依台庇屬拘賤職阻奉壽觴輒罄卑誠聊伸
慶牘

賀太守正啓

一氣更端三元集慶玉曆著頒時之紀木鐸施布始
之音當品彙之向榮宜仁賢之介祉恭惟 某官高
明碩德經濟宏材惠洽春風布熙朝之盛意教漸時
雨下膏澤于庶民茂對昌辰陪迎戩穀某守官巖邑
阻慶台階躬莫遂于鳧趨誠已深于燕賀卑飛短翼

幸棲息于喬林寒谷枯荻賴吹噓于暖律

賀太守正啓

桃符逐厲俄驚一歲之除椒頌薦馨共慶五期朝之會
恭惟 某官佐王之學當陪國論承流之寄尚布藩
條寅奉夏時肆頌堯曆進牛鞭而占歲憑熊軾以班
春咸欣欣聞樂鼓之音舉熙熙有登臺之樂東閣之
梅紀瑞已開故歲之花南國之棠交蔭留誦他年之
慶

賀太守正啓

夏時御正周曆更端首三統以承乾交兩儀而畫泰
恭惟 某官价藩均佚秘殿紬書歷事三朝親逢一
旦日月十二會已符營室之占春秋八千年宜介大
椿之壽方修慶牘遽陞嘉音雖涸輒垂枯久後卧龍
之起而孤根欲朽空觀萬木之春

賀太守正啓

五勝代興既周必復一元更始以故為新賢德所臨
春祺攸介恭惟 某官碩大光明之傑循良慈惠之
師二千石班春占土牛而得歲五百年佳世摩銅狄
以興嗟履運中興逢辰交泰一域色喜欣欣上旄羽
之塵四野春聲藉藉滿袴襦之詠其為瞻頌難盡名

掛卷

言

賀太守正啓

魯經書五始之元漢儀紀三朝之會繫萬寶化生之日兆羣賢彙進之祥恭惟某官哲謀肅乂之才正直靖共之德親逢聖旦方興見晚之嗟順履王春宜介朋來之祉某自憐老去寔聳遐瞻千指蒙休竊芘棠蔭之舍一觴獻壽莫持椒頌之盤

賀太守正啓

太史書元上經揅泰三朝謹始萬寶趨新恭惟某官魯國真儒漢京循吏特達李將軍之勇一諾可重

于百金妙絕張公子之詩千首固輕于萬戶蓋聲氣相求于一道故深沉靡間于殊途殆茲歲序之更獨見人求之舊賦椒盤之頌莫瞻列炬之光分棠舍之陰亦預班春之澤

賀太守正啓

門垂葦索盤頌椒花星回斗野之杓春入練江之色恭惟某官才高帝胄名著吏師與庶民共楚臺之風得賢者樂齊宮之雪道載土牛之出遙知卿月之臨門闐櫪馬之喧室想德星之聚方納復新之慶尤深懷舊之私黃絹占詞白衣載酒渴心不展莫預西

園飛蓋之游食指可占詎有北海空尊之歎其為欣
頌莫究敷宣

賀太守正啓

林豈塵

龍躔布朔正一元于七十二候之初鳳曆授時謹五
始于三百六旬之首惟賢人之順履符泰道之吉亨
恭惟 某官道直以方氣溫而厲播千里循良之政
宣九重寬大之條薰然和氣以襲人煖若新陽之煥
物五百年間世行應君明臣良之期二千石班春宜
介小往大來之吉羣情胥慶萬福攸同某奔走下僚
栖遲大庇椒觴薦壽慙慶謁之未遑寒谷回春正吹

嘘之有待

賀太守正啓

四序密移物無終否三微浸大福有朋來恭惟 某
官躬誠明之姿撫休嘉之運九歌申勸每懷天保報
上之心衆正景興共享既醉太平之福逢辰茲始稱
壽宜先自憐幽屏之餘莫預駿奔之數獨无高論進
翰拔薤之忠尚有寸誠堪賦頌椒之什其為欣願難
盡名言

賀太守正啓

銅渾觀象歲籥代終玉燭宣和春元茲始恭惟 某

利物一方歌展驥之才祇恐匪伊之間別有非常之
詔初春在候百祿是適如某者碌碌寒生區區末吏
奔馳莫遂阻稱椒柏之觴詠頌唯勤仰祝松椿之壽

賀通判正啓

日謹孟陬律占太簇一氣協乾元之始三陽同泰道
之亨恭惟 某官為時偉人受天間氣名邦貳政暫
分千里之權急節頌恩即迓九重之召當履端之謹
始宜福壽之駢臻某獲廁下僚仰依大庇願官箴之
有守莫遂稱觴惟竿牘之是修第深馳慶

賀通判正啓

戴翼

此下二首本無之

曆日頌元忻際三陽之泰屏星增重懋膺百福之升
式對昌辰恪陳善頌恭惟 某官炳炳文章之鳳振
振仁厚之麟聞望顯昂胸襟冲粹共仰泰山北斗平
分霽月光風屬鳳紀之更新宜龍光之鼎至歌騰康
海想驥足之難淹詔下自天佇鵬程之直上某幸依
厦屋倏轉春規無階修敬于壽觴謹用披誠于慶牘
春生別駕薰陶分屬邑之輝日奉辦香耆艾頌闕宮
之詠

賀通判正啓

方岳

閭闔開黃道聿新鳳曆之先燕寢凝清香誕輯虎符

柳林

之瑞春融葭管頌浹椒盤恭惟 某官氣涵玉燭之
和識造璣衡之妙昔無襦而今袴汗青遄紀于竹書
言如綉而出綸泥紫已塗于芝地字天交泰朝野所
需某三見嫩訾一掃塊北雲深戟衛諒鳴璆蟻泛之
春日轉觥稜覲鏘佩雞人之曉中和氣益熙皞詠均

賀都統正啓

四序平分歲星更始三陽暈進卿月高升恭惟 某
官門地山西之豪時望南斗之傑磊落掀天地一丸
泥可封百二之關叱咤生風雲半段槍可破十萬之
衆爰介春祺之慶猥先故物之求緹騎昂來函書拜

辱渴心不展空懷賀履之私輿論可占行有築壇之
拜但深欣頌莫究名言

賀都統正啓

履三朝之會方占參尾之中登四海之圖今在斗牛
之次有開令序凡屬休辰恭惟 某官肇復春元密
膺帝賚總戎旃之重有嚴帥聞之雄聯而貂冕之華宜
視公槐之貴名偕日起道與時亨壽福如臧行致百
朋之復老衰而耄又驚一歲之除

賀路分正啓

炎正嗣興接千齡之統王春肇序登四海之圖惟時

掛於金

百戰之多宜受朋來之祉恭惟 某官鞭笞犬羊之
衆號漢飛將軍駕馭貔虎之師為唐大都督名書鐘
鼎勲著旂常迨茲熙旦之逢益茂春祺之介倚爪牙
之衛久外總于師干資帷幄之籌盍坐圖于廟勝其
為欣頌莫究名言

賀路鈐正啓

星紀初回春祺紹至三陽朋進一德上行恭惟 某
官深沉雄毅之姿奇麗福艾之相奮空拳而抗虎亢
絕藝以屠龍入護中宸作朕心膂出膺外閫為國爪
牙履茲贊陽出滯之辰宜介小徃大來之吉元戎十

乘可擬金城百雉之崇袞服九章行膺台躔六符之
象

賀監司屬官正啓

竊以魯史書元義經畫泰星躔正位日建寅宮恭維
某官挺膺敏之才遇緝熙之運雅騰聲于朝野路猶
贊畫於計臺順蹈休辰茂臻景福某拘維官次隔越
賓除莫躬薦于壽觴敢驛馳于慶牘

賀正啓

靈臺觀象知辰集于椒訾緹室候甯驗律回于太簇
三陽交泰萬物咸新伏惟某官器局宏深風度凝遠

對履端之令節擁來舍之麗休某限守官箴阻陪慶
集未遑修于竿牘先辱貺于函牋感愧之私名言曷
罄

賀正啓

天地既交于時為泰君子寢長與物偕通恭惟 某
官綽著吏能雅為國器順履吉亨之會茂迎福祿之
來佇被褒陞徑居華要莫遑稱壽但極馳誠祝頌之
深喻言奚既

賀留守正啓

留守

一歲始而為正三陽交而成泰乃天地資生之會寔

君臣受福之時恭惟 某官德業亮天誠明周物夙
富經綸之學屹為柱石之材望重兩朝進退悉歸乎
禮義道高萬世始終不累于功名神明所扶福祿來
附方懇辭于機政暫出鎮于留都圖任舊人將再調
於元化永錫難老庶大庇於斯民限守官箴阻趨鈞
祀

賀正啓

四時成歲肇見天正七日告期潛升陽德惟一元之
資始見萬彙之嚮生伏惟 某官才冠一時能兼器
數鷹撮盧擊慄施設之可觀羊狠狼貪紛遁逃而遠

去風政甚異善最推高履茲新陽宜有厚福某竄身
榛莽弔影江湖望一丈之芳筵阻陪廣坐非百函之
妙手愧託尺書

賀正啓

新曆既頒蓋履端歸餘之歲羣情交泰正贊陽出滯
之辰恭惟 某官厚德鎮時高名華國非獨疇咨之
用已簡上心更膺難老之祥以符民望官守所限展
慶未由欣頌之深敷陳罔既

賀正啓

歲起于東茂對三陽之盛物生于震聿開萬化之端
伏惟 某官行應中和道含純粹屬四方之繫望簡
三后之眷懷德為民彝故稱宗廟之器功在王室是
為社稷之臣順履昌期具膺繁祉佇奉承於典冊復
登翊于巖廊某限守印章阻趨墻屏

賀正啓

獻歲發春驗天時之興廢履端居正觀君子之威儀
伏惟 某官抗志不羣誠身以善雄深雅健文為一
代之宗敬義直方名列四科之上出遇亨嘉之會踐
更中外之權致主惠民已著大儒之效因時受祉益
隆仁者之年傾祝之深翰墨莫盡

賀正啓

伏以百華燈動明庭已樂于稱觴萬寶春回寒谷何妨於奏律率土雖廣歡心所同伏惟 某官元善長人忠誠許國恩隨天地故其德足以佐王才與時行故其政可以成國兼誠兩路之民庶率已而先同享三陽之福祥自天而祐蒞官有限拜壽無緣

賀冬

賀太師冬啓

爰象見天地之心一陽來復賢哲應亨嘉之會百祿是道茲視履以考祥宜應時而納祐恭惟 太師朝

廷元老社稷大臣措基寒緒於覆盆納生靈於安堵觀風雲之際會度越古今盡日月之照臨傾殫肺腑令旦適逢于剛長繁禧茂擁于朋來某自顧鯁生得依鴻苞尚阻守符於遐壘莫陪賀履於崇墀祝頌惟深敷宣罔既

賀太師冬啓

伏以卦變初爻紀一陽之來復氣鍾子位丁萬物之孳萌恭惟 某官峻德自天純誠憲道聳師瞻於百辟著勲寔於四朝屬此盛時眷於元老既切菟裘之請乃隆鳩杖之頒鉅節冠映于古今美範儀刑于內

外方初陽之貫序宜百福之在躬某阻奉慶觴第瞻
賀^寶庶其為系頌尤劇蘊悰

賀太師冬啓

琯反浮暖一陽初動於黃鍾圭景迎長萬彙咸熙于
化國應受宜民之祿孰先同德之賢恭惟 某官運
契千齡仁漸九有雍容廊廟轉一氣於洪鈞鼓舞華
戎調四時于玉燭祥紀卿雲之瑞德侔愛日之輝適
三歲以視祠環百神而受職雖雖肅肅方勤顯相之
儀簡簡穰穰^協叶朋來之慶某忝司外計邈在閩陬
乘使者之軺願^頌銜恩而有地望翹材之館繫薦壽以

無階頌詠攸深名言罔既

賀少保冬啓

物資其始萌萬寶于將亨氣動于微升一陽于方長
伏惟 少保名家偉器聖世真才柱石朝家箕裘相
業佩服義方之嚴訓茂隆寅亮之元勳繡縷初長遇
朋來之七日綵衣起舞宜並享於千春

賀宰相冬啓

林豈塵

準瑟聲明中應清絃之畫律仄衡折初移白琯之春
維時當迎至之期在禮有履長之賀恭惟 某官賢
德可以剛道用享得出處語默之宜悟消長往來之

掛表大全

理靜以符陰陽之定欲薦施燮理之功復其見天地之心將再宣寅亮之化姑從五日之樂茂隨百福之休某遙望光躔敬為善頌上壽中壽下壽凡三壽作朋願續于詩人大書特書屢書不一書秉筆請從于史氏

賀宰相冬啓

黃帝得天之統陽復當曆數之元伊尹秉國之鈞時運際功名之會履三陽之協應荷百祿之寵綏恭惟某官盛業格天精忠貫日陶鈞萬物運大化以無心底定四方浩告成功而冠古宜及履長之候順膺賞

善之休某託芘鴻鈞備員遠服登觀臺而望祲但期農畝之豐穰念齒髮之愈衰願遂田廬之休息

賀宰相冬啓

周圭測日方占化國之長魯史書雲肇起觀臺之瑞於時而復以道則亨恭惟某官燮理化元經綸治具輔贊彌縫而藏諸用動靜語默以順其宜考諸禮經待陰陽之所定明乎易象知消長之自然茂對朋來肇迎嘉慶某叨縻印組久辱鈞銘東閣門深阻獻柏觴之壽南州地遠徒修竿牘之儀

賀宰相冬啓

竊以剝極而靜復來以亨肇見二儀之元潛萌六氣之本閉闕息務君子得輔相之宜旅地蓄雷聖人謹順行之象陽德方長陰柔漸消致時咸宜與國同慶禮如元日古有賀儀况属^朝坏陶敢稽^函摯恭惟昭文相公啓蹈德業保釐邦^朝矢謨盡舜臣之心憂國有漢相之體經綸萬彙師長百寮中外具瞻夷夏矜式總持政柄協亮帝工處星上台體貌益峻享天五福播紳所難適臨日至之初宜有神休之格某貳輸東蜀遠迹黃扉阻趨下列之塵徒竊大鈞之庇

賀宰相冬啓

史書雲物紀麟筆之五年復見天心驗羲經之七日恭惟某官精忠許國巨業濟時遇時見哲人之難以身任天下之重險夷一節出處兩全商鼎監梅夢昔形于帝賚周詩袞繡人咸跂于公歸展茲長至之辰宜納朋來之慶某職居佐郡禮廢稱觴輒布露于尺書莫趨陪于文席

賀宰相冬啓

布律而候氣萌動于黃宮立表以須景長至于南極伏惟某官受材闕廟含德粹純壯經國之大猷濟格天之盛業履茲令序茂集休祺典冊袞衣竚履三

掛
未
三

公之位旂常萬萬當傳萬世之功某祇服官箴遠違
門著素積依歸之望彌深禱頌之勤

賀宰相冬啓

氣肇黃宮本天正而成三統道隆台輔熙帝載以叙
九功方曆數之迎長宜福祥之視履恭惟 某官淵
謨經世亮節致君鞏固宏基自保棟隆之吉變和大
化聿致鼎飪之調宜膺陽復之亨懋享神祺之介顧
惟衰迹久託鴻鈞仰占雲物之祥無裨大化慨想林
皋之適以畢餘生

賀兩府冬啓

伏以周髀占天回建星於北陸子雲推易起中首于
黃宮物輳微陽時臻景福伏惟 某官言比說命智
協蕭規贊襄一德之訏謨鼓舞二儀之化育躋世仁
厚議功崇高上陪星拱之巖下仰棟隆之吉道由方
大已坐晉于光亨神聰靖共宜來從于戩穀某屬縻
州綬阻覲泰階第深慕用之誠曷究勤倦之禱

賀樞使冬啓

乾坤之大陽盛則君德昌日星之交復亨則邪類息
宣宅底滯葶萌惠和况乎聖賢相逢動靜交養助天
長育喜開剛長之端持國權綱會履陰消之漸矧同

品彙皆玷洪鈞致慶之勤擘牋敢後恭惟 某官為
國元老柄時洪機著龜本朝領袖百辟疇諮大政常
警悟于上聰董轄中樞已救寧於國步惟是丞弼之
列遜於才資之明特立獨行不變風尚清名健節自
移鷺浮者哲奮庸盛世增美朝冠野憤旦頌夕歌人
方具瞻天必眷祐乘茲日至之始宜有神休之儲某
拜慶不遑冥中以禱

賀參政冬啓

陽既潛萌氣應黃鐘之律日方南至瑞符太史之占
顧茲來復之辰宜享彙征之福恭惟 叅政樞密稟
天間氣為時宗工正直禔身忠誠許國遇中興之盛
旦茂夾輔之元勳式逢剛長之辰羣陰退聽茂擁朋
來之慶諸福駢臻

賀侍從冬啓

反復其道始知天地之心齋戒以寧蓋待陰陽之定
在禮可賀于時為宜恭惟 某官道直而方氣剛以
大功濟乎世將作傳說之霖德媚于人可愛趙衰之
日肇復朋來之序茂膺難老之祥某叨守海邦阻趨
屏著捧觴上壽莫瞻君子之光儀荷橐增輝敢頌賢
人之久大

賀侍從冬啓

律應黃鍾運^建子位為天地資生之始乃君臣受福之時恭惟某官柱石元勳著龜舊德處朝廷以正直安天下以惠和偉然事業之光華休有神明之協相茂迎令序倍格龐禧大賚善人方允升於高位永錫難老將久庇于生民某限守州符阻趨鈞屏

賀給事冬啓

一陽來復天序^靡差百福咸臻物情胥悅恭惟某官衣冠令族文物高流游息詩書頗得名教中樂出入諷議自是天子遣人履茲亨辰宜膺峻擢某行歸故里尚借餘光滯此一官阻于數舍夢隨賓客共稱賢聖之觴心掛門墻但祝松喬之壽

賀客省冬啓

亞歲令辰書^雲吉日方天陽之氣至宜君子之道亨恭惟某官器術疏通才謀沉遠矧久臨於要^任伏茲益茂于勞能佇陟^寵榮冀加珍衛

賀師使丞相冬啓

伏以玉律飛葭驗黃鍾之氣應靈臺觀象當昴宿之星中恭惟某官^峻峻德自天純誠憲道聳具瞻于百辟宣謹議于三朝屬此盛時有裨鴻化暫憩蕃宣之

地即還丞弼之司上翊隆平以符譽望方初陽之貫
序宜休福之在躬某阻慶奉觴第瞻賓廡其為系頌
尤劇蘊悰

賀帥使丞相冬啓

伏以一陽來復萬寶孳萌周正肇紀于天元魯史仰
瞻于雲物伏惟 某官受天間氣為世鉅人輟巖廊
之鈞衡司留都之莞籥龔黃政事茲以洽於輿言稷
契謀謨即亟還于宰路履茲穀旦萃止殊祥某遜守
州符阻陳賀掌其為祝頌寔倍等夷

賀帥臣冬啓

微陽肇復庶物更新盪袪不祥逐羣陰而盡竄道迎
多祐乘一氣以俱亨宜有神休來相賢業恭惟 某
官儒紳元老禁苑名臣久著望于朝端暫偃藩於方
面利有攸徃道已應于朋來罄無不宜福將迎於胡類
至竚承節名入輔帝猷某限守州符阻趨賓次

賀帥臣冬啓

伏以土圭測景肇迎日至之長玉律飛灰潛應陽來
之候恭惟 某官先生維嵩孕秀大昂儲精量涵萬
頃之陂材挺千尋之榦早見知于當宁俄出鎮于名
藩想茂對于嘉辰宜倍迎于介福某孤寒薄宦依仰

擬表

巨庥禮莫遂于鳧趨門墻冀遠誠少伸于燕賀竿牘徒勤

賀帥臣冬啓

一陽資始萬物更新發施天地之和敷錫君臣之福恭惟某官生民先覺命世上才總節制于東州坐銷姦慝宣詔條于屬吏盡格循良坐迎日至之長茂擁百祥之助七日來復宜君子之階升三節以趨將龍光之兼被某限拘符守阻造賓墀

賀帥臣冬啓

三務成功再謹天正之候七日來復是昭陽德之亨扞邊方倚于長城介福宜隆于亞歲恭惟某官功存社稷力保封疆緩帶輕裘久重岷峨之勢高鋒長轂即清灞渭之塵方同敵愾之勲宜享履長之慶觀臺望稜將盡洗于兵氛樽俎折衝願永綏于壽嘏恭承尚阻欽祝良勤

賀帥臣冬啓

周正授歲取鐘聲律度之和漢史占天見璧月珠星之次方此陽暉之長寔惟賢德之亨恭惟某官學造淵源才周經緯建旄分閩已分成外服之勞正笏垂紳方踐中臺之任順此履長之慶適當促覲之期崇

論宏言蘊忠誠而入告隆名異數與剛德以偕升瞻
祝之誠敷陳罔既

二月三十日亥刻校畢

聖宋名賢五百家播芳大全文粹卷二十六

聖宋名賢五百家播芳大全文粹卷二十七

賀啓

賀冬

賀總領冬啓

緹室飛灰瞽奏仲冬之律觀臺候氣史書至日之雲
顧晷運之推移知善祥之叅會恭惟 某官勲庸時
懋道德日隆久更事任之華備著猷為之美總邦財
于六路坐究盈虛循天令于四時靜安消長屬當亞
歲倍擁殊休某偶佐郡條阻瞻使節奉觴為壽莫陪
下客之趨與國同休敢後輿人之祝

賀總領冬啓

緹室飛灰當一陽之來復清臺課曆正萬物之資生
福以類升道因時長恭以某官譽推人傑行協天
心卓然王佐之才允矣公輔之器暫統綏于六路爰
刺舉于百城攬轡馳驅覩使星之耀彩摩霄翊翥覺
卿月之輝騰茂擁繁禧坐凝順履某叨居郡佐託
部封引領崇壙莫遂鳧趨之願爲心短牘聊伸襍獻
之誠欽頌惟勤占詞罔究

賀漕使冬啓

觀象靈臺日初躔於北陸飛灰緹室律已應於黃鍾
君子攸宜福祿是荷恭惟某官養氣剛大凝姿粹
和挺秀儒宮素博通於經術飛聲仕路久益奮于材
猷妙簡宸衷屢將使指七日來復適丁剛長之辰三
節以趨佇慶大來之吉某限拘官守阻造行臺瞻頌
惟勤敷宣罔既

賀漕使冬啓

玉曆頒冬璿杓挿子眷一陽之令節屬千載之昌期
恭惟某官才猷敏劭學術深純綿歷居多委寄攸
重聲華傾於衆望功業見乎有為豈惟飛輓之權可
究經綸之策道大來而小往時陽息而陰消茂擁繁

禧坐凝順履某叨居郡佐託芘部封引領崇墉莫遂
鳧趨之願寫心短札聊伸機獻之誠欽頌惟勤占詞
罔究

賀漕使冬啓

王圭測暉肇景長于華晷雲臺書瑞瞻歲美於康年
伏以 某官聖旦嫩才士林懿範蹈忠嘉之全德周
劇易之良能宣使指於閩河足兵儲于郡國聲馳諸
部風動屬城即最課于黼帷膺渙恩于緜檢履茲昌
序茂集蕃禧某阻致慶於壽觴第馳誠於賓廡

賀憲使冬啓

一陽起于黃鐘是為生物之本三正肇于天統爰脩
亞歲之儀伏以 某官蘊識精微持心端厚士林孰
出其右朝廷當器其能華省專曹已久更于事任輶
車折獄固共仰於德輝茲履昌辰併膺繁祉佇被絲
綸之寵入躋臺閣之嚴某徒切詠瞻莫遑展慶其為
企頌曷既喻言

賀倉使冬啓

伏以五始謹元肇先于天統一陽來復初暢於宗萌
伏惟 某官德宇淵淳天資粹美受兼人之術畧稟
照物之襟靈阜財每蹈于中和按部共稱于信厚宜

因令序進陟寵章某阻致慶于壽觴第馳誠于賓廡
其為禱頌周喻惓勤

賀倉使冬啓

肇復一陽潛萌萬物應書雲之觀望增化日之舒長
仰矚使華倍祈天祉恭惟 某官才資高遠德性温
恭結明主之深知聯外臺之要職訓齊法守開闢利
權聳人望之日崇宜神休之有相三微正始方協慶
于令辰百福應期佇進膺於嘉命某限拘官守阻造
賓階無任傾依祝頌之至

賀監司冬啓

化國之日舒以長一陽來復君子之道温而理萬福
攸同恭惟 某官志在澄清動歸剛健如冬可愛易
消窮谷之寒與時偕行盡放孤根之暖德肖雲臺之
瑞威留吏瞻之冰風吉有功已作觀風之李固朋來
无咎更為入覲之韓侯某徒真柔函莫追賀客三年
官學屢經驚節物之蕭條數仞門墻欲探陽和之消息

賀監司冬啓

一陽來復見天地之因時五福類升知賢人之得志
恭惟 某官高風邁世卓行名家養素邱園已擅濡瑤
林之秀發身霄漢遂分使節之華茂對亨辰宜膺寵

祿某竊食支郡繫職下僚再拜奉觴莫綴曳裾之列
千春祝壽但馳染翰之勤

賀監司冬啓

四時成歲肇見天正七日告期潛升陽德惟一元之
資始見萬彙之嚮生伏惟 某官才冠一時能兼數
器鷹撮盧擊凜施設之可觀羊狼狼貪紛遁逃而遠
去風政甚異善最推高履茲新辰宜有厚福某竄身
榛莽弔影江湖望一文之芳筵阻陪廣坐非百玉之
妙手愧託尺書

賀監司冬啓

日次南躔氣萌北陸時即仲冬之月厥惟亞歲之辰
竊以 某官挺膺敏之才擁光華之節宣勞於外既
漕計之辦敷降旨從中宜禁途之進陟適茲穀旦介
被繁禧某領郡攸拘造門是阻其於欣詠罔究指陳

賀監司冬啓

新陽初復已潛育物之心君子道亨宜享自天之祐
伏以 某官深仁及物令德持身顧外補之淹回正
輿言之嗟鬱某末由祇慶先沐貽書頌詠之私敷宣
罔既

賀判府尚書冬啓

清臺課曆迎長至於日躔妙律均聲導太和于天統
伏以 某官賦材闓爽秉德靖共文陛決科自致羣
英之右禁林視草可追兩漢之風惟聞望之久隆矧
眷懷之素厚比緣請外暫適均勞倚重蕃宣已報龔
黃之政總釐部省行觀姚宋之能履此泰辰倍迎殊
祉某弗違為壽第切馳誠

賀判府龍圖冬啓

伏以卦起中孚日臨南極咸具踐長之慶爰脩亞歲
之儀伏惟 某官德履純誠材猷通敏剴紛繁於中
外能懋勉于初終職兼侍從之華任委蕃宣之重馳

頌聲而載路諒戩穀之如茨矧茂對于天正宜密迎
于神貺某屬居宮鑰阻奉慶儀頌詠之誠敷宣罔既

賀太守冬啓

天心來復七日之亨有初陽氣潛萌萬物之生以此
茲謂履長之慶宜膺多福之祥伏惟 某官性稟純
誠識窮至蘊講明道德是惟舊學之臣啓沃謀猷蔚
有嘉言之告暫遂偃藩之便已勞側席之思即膺圖
任之求庸慰具瞻之望某顧慙衰朽方卜退藏自期
田畝之獲安惟幸仁人之在上傾依祝詠文集集惊靈

賀太守冬啓

微陽肇復庶物更新盪祲不祥逐羣陰而盡竄導迎
多祐乘一氣以俱亨宜有神休來相賢業恭惟 某
官儒紳夙老禁苑名臣久著望于朝端暫偃藩于方
面利有攸往道已應于朋來罄無不宜福將迎于類
至竚承節召入輔帝獻^獻某限守州符阻趨賓次

賀太守冬啓

伏以葭管飛灰律應黃鐘之候魯臺觀象史書雲物
之占惟德履之考祥宜神休之薦祉恭惟 某官體
性而靜據德而純行膺當守之求暫屈專城之任甫
臨穀旦大集洪禧某幸託巨休獲安下邑欲捧觴而

莫遂但馳頌以彌深

賀太守冬啓

竊以亞歲迎祥新陽協序氣肇三微之始福臻百順
之名恭惟 某官廊廟宏材圭璋偉器早被九重之
眷暫持千里之權茂對令辰宜膺簡福某限拘官守
阻造眉閔躬拜壽以無階徒望風而有祝

賀太守冬啓

伏以周歷紀元協斗杓之揅指魯臺觀象書雲物之
呈祥君子履時神明介祉恭惟 某官道偕陽長德
與日增儒林夙藹于聲華仕路咸遵于矩範暫處分

符之任茂著宏休行歸持橐之班大摠素蘊宜逢亞
歲茂集繁禧某限佐邊疆阻趨屏著莫遂壽觴之慶
其如願望之私

賀太守冬啓

一陽滋進百福駢臻方深企詠之誠遽沐周詳之問
恭惟 某官篤修德履敏裕物情茲典領于州符已
康寧于民瘼益希保衛以佇寵光

賀太守冬啓

伏以卦首中孚日臨南極寶典紀踐長之慶史官書
望瑞之占伏惟 某官文武全能忠嘉厚德以學術

藻飾吏事首映士林以行業輔翼政機睠深宸宸暫
均休于巨屏豈久鬱于具瞻屬履嘉辰倍膺殊祉亟
登元鼎以耀太階某屬守隣藩阻伸慶幸永言馳頌
罔既抒陳

賀太守冬啓

愛景初長式接璿璣之度新陽肇復順迎玉律之光
允宜大賢茂迎純嘏自天降祐與國均休恭惟 某
官據德之純體性而靜暫屈專城之寄行膺當守之
求亞歲甫臨洪禧攸介某備員下邑阻造台閣但馳
頌以彌深欲捧觴而莫遂

賀太守冬啓

伏以律推定候復萌地之一陽歷考常經會麗天之
七曜恭惟 某官賦材端勁鍾性敏明親迎熙洽之
盛朝躬奮經綸之偉業暫淹俊躅遠駕侯轡平昔聊
城已著去思之頌乃今沂水側聆來暮之歌方順蹈
于休辰宜具膺于純嘏適茲染慶適爾拜嘉欣與愧
并意非言盡

賀太守冬啓

鳳鳴嶰管肇移緹室之灰瞻伏藥淵初養廣寒之鬼
于時而復以道則亨恭惟 判府中大政為吏師器
蘊相業厚德暖物真宋廣平所至之陽春和氣襲人
如趙成季可愛之冬日維茲三極茂擁百祥某遙望
光符敬伸輿誦五日從樂獲覩迎至之儀萬福來求
敢効履長之賀

賀太守冬啓

氣應黃鐘肇紀天元之建景旋南陸茂迎日至之長
竊惟眠履之休宜享彙征之福恭惟 某官高名映
世雅景絕人釋省闈之徊翔均輔藩而偃息政流民
悅協應宮聲之和德與時行仰如雲物之瑞甫臨嘉
序茂集繁禧佇三節之召還偕一陽而來復顧誦言

之雖切悵謁賀之無由首辱移書益深銘德

賀太守冬啓

舜璣觀象迎長至於箕躔鄒律吹灰肇太和於天統
陰窮于剝陽復而升正君子之大亨與廟堂之均泰
恭惟 某官才猷應世問望高時抱忠義於邦家勒
功名於典冊比分閭柄亟騰威畧之聲旋偃便藩益
著循良之政式遵令序宜茂繁禧即趨近密之班以
輔太平之業某方祇行役將遂參承欣頌交深敷宣
罔既

賀太守冬啓

日極南端星占東壁惟陽德來復之始乃善人奮迅
之秋恭惟 判府侍郎德冠朝倫才高藝苑三槐論
道行登鼎鉉之司千騎班春暫寄股肱之郡履此亨
嘉之序宜膺壽福之祥某叨預官聯僻居郊野望長
裾之賓客莫並趨承企雄戟之門闌徒深頌詠

賀通判冬啓

伏以君子明時方慶一陽之復吉人為善宜膺五福
之歸恭惟 某官遠業濟時高才華國半藩宣化暫
淹龐統之才紫橐還朝式展魯恭之政嘉辰茂履戩
穀來綏某郡紱所拘椒觴阻奉莫趨陪於賓宇但瞻

仰于星躔傾願之深敷宣罔既

賀通判冬啓

伏以雲紀觀臺咸仰非煙之瑞繡增宮線共欣化日
之長陽氣肇升君子需慶恭惟 某官公輔之器邦
家之光別乘暫淹即播海沂之詠賜環榮詔定為廊
廟之才順履昌時茂迎純嘏某試官邑尉託比雲天
阻為賤職之拘莫廁賀賓之列但勤祝頌難盡敷宣

賀通判冬啓

伏以珠星璧月祥方契於天元玉律黃鐘氣已交於
南至當一陽之來復集百順以駢臻恭惟 某官學
際天人識探繫象蹇蹇王臣之節謙謙君子之光別
乘風流雖翱翔于半刺佩刀氣象已兆朕于三公履
茲迎日之長宜錫自天之祐某職拘匏繫慶阻鳧趨
遙跂台躔第深善頌

賀通判冬啓

肇序一陽候應黃鐘之律潛萌萬寶卦當來復之辰
君子攸宜吉人為善恭惟 某官持心厚重稟量恢
宏太羹玄酒而斯文自醇璞玉渾金而所養尤粹屏
黷絢采聊密贊于褰帷鳳閣擣華即顯觀于調鼎履
此亨嘉之會倍膺純嘏之休某仰託鴻恩備員屬吏

阻趨大廈第增燕雀之誠遙望崇墉恨隔雲泥之勢
其為占頌曷勝敷陳

賀通判冬啓

元陽肇復愛景初長魯臺有雲瑞之書鄒律驗氣和
之應君子所履福祥薦臻恭惟 某官道與時亨德
偕日進夙藹朝紳之譽行持從橐之榮半刺分憂已
共綏于遠俗十行頒詔即入覲于清光蓋衆論之攸
歸宜百神之交相某備員倅貳託迹忼蒙無緣台屏
之趨莫獲壽觴之獻其為祝頌豈易敷陳

賀通判冬啓

律變黃鐘驗一陽之肇統日行遠道周四格以騰輝
千載應期四方交泰恭惟 某官嘉猷經世碩望冠
時寔朝廷之羽儀為播紳之領袖同流王化聊處治
中弼亮天工用摠遠業當茲令序宜擁殊禧某未躬
賀廈之勤徒切望雲之劇欣懼交集叙陳曷同

賀通判冬啓

周正協己紀方肇氣于黃鐘堯日迎長遂旋暉于北陸
盛儀亞歲吉履逢辰伏惟 某官碩德茂民宏才緯
世夙負經綸之志茲當刺舉之權與國同休將益隆
于眷眷如冬可愛亦允契于羣情佇觀百祿之是道

揚芳大全

式應七日之來復某坐縻巖邑阻造賓閣頌詠徒深
敷宣罔既

賀通判冬啓

玉管召陽土圭測日推物萌之載始嘉道長之方來
君子對時神明協慶恭惟 某官靖恭秉德直亮端
懷早膺中宸之眷求雅為多士之師表暫資賢望出
佐方州宜民之謠既喧聞于載路自天之報方順履
於迎長竚奉褒恩入躋近輔

賀通判冬啓

書雲應候測景踐長方陽德之時升宜君子之道長
恭惟 某官性資宏厚器識䟽明暫閑決于名藩將
陞躋于華胄俯迎令節倍格繁休方修拜慶之儀遽
辱飛緘之賜但勤誦願尤極感銘

賀通判冬啓

連珠合璧密契于昌時候氣占風前知其善歲一陽
來復五福類升恭惟 通判大夫世載勲庸家傳忠
孝化民成俗已高循吏之風決事如神復見古人之
政履茲令節宜擁純禧某猥以衰孱繫于職守攝衣
以往未獲于升堂跪酒而前莫陪于獻壽

賀冬啓

天元肇建氣應黃鐘至日舒長景旋南陸竊惟視履
宜享殊休恭惟 某官大雅典刑播紳耆舊宜民厚
德協應宮聲之和映世高名仰如雲物之瑞甫臨佳
序茂集繁禧佇聞三節之召還偕皆與一陽而來復首
蒙賜問益厚銘藏

賀冬啓

黃鐘肇始周開建子之祥朔日正南魯謹書雲之禮
諒履長于亞歲當倍擁于殊祥慶牘未脩華緘首眈
曲示課謙勤之意第深銘佩之私

賀冬啓

伏以陽效來復寅賓化日之長慶禮交馳申篤善鄰
之好恭惟 某官拜繇履考道協泰通茂膺諸福之
歸用對三微之始某坐縻印紱阻造門墻惟頌禱之
至深在叙陳而奚既

賀冬啓

節啓天正既辨五雲之物時惟吉士是膺百福之祥
恭惟 某官稟德渾剛賦姿明果文華綺散名馳羣
俊之先論議風生意出諸儒之表宜膺殊祉茂對亨
辰某攝領郡章阻趨臺府奉雕觴而跪席莫預獻鼎
汗青簡以占詞徒傾頌祝

賀冬啓

月臨天統首冠于三正氣兆黃宮復來于七日候微
陽之協應君子之彙征伏惟 某官碩德比民傑才
經世踐揚中外之寄益推望寔之隆既醉太平寔具
周壽之福大有上吉允符義易之占某限以守邊未
遑稱慶徒深善頌莫罄鄙懷

賀冬啓

伏以物壯則老肅殺所以成歲功否終必傾來復然
後知天意凡在含生之類休有向榮之心伏惟 某
官履信體仁秉德迪哲才無施而不可道得時而愈

隆旌當彙征元吉之辰宜享既醉太平之福某限拘
官守阻候門墻瞻頌之深敷宣罔既

賀冬啓

伏以候緹室之清宮警告以日卜臺觀之黃稜史書
有年共安消長之來以待陰陽之定伏以 某官才
猷傑異道德深醇靖共正直之休順獲天人之助某
恪守官次阻稱壽觴坐馳傾向之心莫罄安榮之遇

生日

賀秦相生日啓

程公巽

歲序收功已報新春之喜嵩靈孕秀庸昭間世之祥

藹佳氣於門庭播英聲于寰海夢熊協旦賀燕均懽
恭惟 某官隆棟殊姿元龜卓識為聖時而特起鍾
賢運以挺生至大至剛氣塞天地惟忠惟孝道通神
明以經綸之長才建社稷之遠慮諫行言聽謨明弼
諧果立非常之功永有無窮之問國鼎增重椿齡愈
新名世五百餘年固已上符于伊尹中書二十四考
殆將遠過于汾陽某夙被挺鎔阻趨墻仞式歌且舞
第勤祝頌之誠俾熾而昌益大期求之慶

賀秦相生日啓

王叔子

嶰管葭灰甫近春陽之載桑弧蓬矢式符巖石之瞻

喜動冕旒歡均簪紱竊以天生李晟來為萬人嶽降
甫侯出藩四國昂依漢明明箕作商霖毓司隸于元精
孕謫仙于太白歷觀前古類產英材矧惟趙氏之昌
率致周邦之喜五龍陰授天開夾日之祥一馬潛浮
神起啓渡江之役黃旗撫運赤紱伏膺符宜有真儒來扶
景祚恭惟 某官氣全剛大性達神明日角珠庭稟
自鍾山之秀錦心繡口凝從沫水之清衛社稷不假
于干戈行蠻貊殆憑于忠信自專鈞軸密啓皇猷和
戎狄以正諸華天文德而洽四國息甘泉之烽火盛
塵水之衣冠祭講燔柴耕陪載相惟至治之君不世

掛

出也待以勿疑故仁人之言其利溥哉動無弗合命
膺華袞執有元圭已建上公復居真相禮樂侍御美
秦仲于車鄰規諫文章配武公于淇澳茲承穀旦倍
擁繁禧一人頌湛露之恩四海述闕宮之頌祝仁者
壽俾熾而昌衍金昆玉友之榮積桂子桐孫之慶莊
椿不老八千歲以為春秋周鼎同扶七百年而卜世
筭某輪囷蟠木局促轅車轉漕潼江考方書於下下
歸耕湔水田矧種於中中豈謂洪鈞復取棄物方征
車之遠邁陪賀屨以無從星現老人永占祥于南極
日尊師尹長寄目于東方慶抃之私敷宣罔既

賀秦少保生日啓

李舜臣

柔風淡蕩景遲化日之長佳氣鬱蔥兆應元精之瑞
門庭萃慶朝野交懽恭惟 某官金玉天資棟梁國
器洒落風塵表物飄逸神仙中人清世英髦千萬人
而傑出黑頭台輔五百歲而間生不唯吾道之主盟
抑亦生民之司命逢時而泰與物為春勲德兼隆宗
廟與同休戚精忠昭格神明所共扶持某罪戾孤蹤
依棲喜造邇風慕義欣逢弧矢之辰滌硯薰毫虔奉
椿松之祝其為欣頌罔既敷陳

賀丞相生日啓

張正己

此下有張文鏡賀李

帥告辭一首

在後幅

潘

卷二十七

七

五百年而名世有開合德之符八千歲以為春願罄大年之祝紛賀僚于大府錫備物于公朝四海傾心一詞贊喜恭惟 某官稟天地中和之氣應聖賢亨泰之期名在圖書夙號中興之佐志安社稷獨成不世之功援斯民于水火塗炭之深登太平于禮樂文明之盛壽域亘八荒之表金城為萬世之安方國家卜世以無疆宜福祿自天之未艾慶傳袞烏封誓山河釀滄海之水不足以飲公之勲汗南山之竹不足以紀公之德階符同耀拱宸極以常尊神嶽比崇鎮坤輿而益固永隆國壽共對天庥某猥以公微久叨

鈞播望公孫之賓閣莫廁下僚歌史克之頌詩第傾善祝

△ 賀張叅政生日啓

日逢弧矢年迓松椿有是君有是臣亶為千齡之盛旦俾爾昌俾爾艾長觀八月之清秋樂事駢闐驩聲環匝恭惟 某官儲精嵩嶽毓秀苕川碩畫元勲久增光於政府沉機深識獨軫念于邊庭雖一時議論之靡諧奈百世聲名之益壯雲霧既掃日月方明爰誕告於治朝以寵還于書殿獨茲均佚共以為疑與其抱高明之節而枕石漱流豈若舒久鬱之才而興

雲出雨亟符夢燕入相袞龍發舒未究之才猷揚厲
無前之勳業某比聞褒渥聊壯慶緘犯顏宜擬于深
辜藏疾已欽于雅度報章下逮餽禮有加坐令山房
岑絕之區如得洞府珍奇之玩有懷銘刻無語發揚
屬逢誕日之臨敬拜長年之祝捧觴稱壽雖不陪賓
客之塵舐鼎得仙猶足以解塵埃之縛

賀李師生日啓

張文饒

始生今日表瑞中秋會辰于角亢之間壽星既見占
夢以熊羆之兆男子呈祥是惟不世之賢蓋亦應時
而出凡叨屬吏展慶今朝恭惟 某官嵩岳儲神珠

躔毓粹流光天上昔為漢殿之星辰肖像人間將作
商巖之輔弼暫煩共理式重于蕃民游愛日之中吏
畏肅霜之下威聲遠暨澄清南海之波誠意旁通霑
足西郊之雨仰茲厚德宜錫遐齡歲俾有千當繼僖
公之頌福陳嚮五式符箕子之言某僻守遠方阻瞻
大厦紛紛鶴蓋相同非霧之陰赫赫龍門莫遂披雲
之便

賀胡帥生日啓

宋祁公

周室中興岳儲神於山甫漢高崛起昂應識于鄼侯
是惟簡_間世之英蓋亦為時而出聿逢聖運宜有儒臣

茲慶誕彌伏深抃賀恭惟 某官天麟表瑞閣鳳呈
儀仰之高而鑽之堅翊諸中而彪諸外其間必有名
世式契休祥正可求之古人是為倫輩殆天所授舍
公其誰暫勞屏翰于坤維即正鈞鑄于天下上心所
屬公議攸歸衛武公九十五齡猶陳懿戒廣成子千
二百歲坐進長生某限守郡符阻趨帥府葱葱煙霧
莫陪賀客之神經栩栩夢魂不遠崇闕之墻仞

賀王帥生日啓

王叔子

維嶽儲靈式誕佐王之輔蒞淮流慶允光濟世之謀
惟叅幹于繁機方翊躋于景化誕辰茲及延禱兼常
恭惟 某官慮總戎韜績宣邦社奮嘉猷而克壯申
吉祿以咸宜蓬矢在門緬懷于先慶野芹寔篚願續
于遐齡有少輕塵具如別幅

賀林憲生日啓

帝賚弼而得說以輔商宗岳降神而及申用強周室
凡厥中興之運挺生傑出之才大火旣流颯涼颺而
屆候長庚入夢踵仙胄以呈祥振古如茲殆天所授
仰景星之下燭屬誕日之載臨叨在庇休伏深抃賀
恭惟 某官學優聖域文擅儒宗早登片玉之科素
積渾金之譽言不慙而行不恥沛然所養之醇仁也

柔而義也剛允矣兼資之美道直而婉謙尊而光大
聲遺節奏之間至寶出雕鐫之外停激澆薄咸推長
者之風忍垢納汙深得大臣之體肅持金節榮煥繡
衣親愛日于三冬畧無霜霰泛汪陂之萬頃不起風
波平反留獄之寃民開釋弄兵之赤子豈若京師震
恐先事埋輪當令四海澄清不忘攬轡所務循循于
中道不求察察之威名諒著陰功自延遐壽惟厚德
則享其富故作善者降之祥衛武公九十五齡猶陳
懿戒廣成子千二百歲坐進長生將欲比方寔為倫
等某閱四方之士蓋積有年得萬世之師創見之今日

自困塵埃之役幸披雲霧之瞻恭遇生朝敢陳吉語
嘉賓濟濟願陪鶴蓋之陰大厦眈眈竊倍燕巢之賀

賀陳漕生日啓

楊祐甫

生山甫以保周岳神降祉配蕭何以佐漢昴宿流光
功名間世而益章壽考為時而難老爰愛垂弧之日
正瞻析木之祥凡屬庇庥率深抃賀恭惟 某官性
根溫厚識造淵微裁剴不留稟若太阿之一斷表儀
斯重巍然象鼎之萬鈞推舉賢薦善之至誠試富國
裕民之大畧宜膺戩穀獲助神明揚使節以嘉聲乃
德門之素業世濟其美有後皆曰臧孫人莫與京其

昌必在欽仲茲承餘慶可卜遐齡幸仰覲于生朝實
難忘于喆語某幸乘偏壘阻造外臺相冠蓋之如雲
隔門庭之非霧顏之既厚尚依長孺之二天誠則有
餘更頌僖公之千載

賀趙主管生日啓

葉元茂

天潢稟潤崧岳儲靈律中蕤賓適應凱風之候時生
英傑光開彌月之祥敢以謏聞敬起善頌竊以神明
之胄所稟特異忠孝之家其慶有餘方將紹續以蟬
連宜得鳳鳴而龍躍增光玉牒來自神仙中人孕秀
金枝迥出風塵表物尤古今之未見以君臣而並生

飛電繞樞已慶千秋之節長庚入夢獨賒五日之期
與社稷同無疆之休寔天地鍾元精之氣備此衆美
惟公一人恭惟 某官行峻履方芒寒色正朱虛之
忠而東平之善江夏之畧而河間之賢迺被服于儒
術之中而論議為宗室之冠彤庭入衛行促近帝王
之居青山自怡姑笑傲仙佛之窟宜佩長生之錄願
賡難老之章五百歲春五百歲秋未多楚木一千年
花一千年實幾度蟠桃某乾坤腐儒門闌下士欣逢
穀旦庸竭菲誠馨效親承窺寶苑莫傳之秘年齡仰
祝伴瓊臺不古之春

雜賀

賀駕幸丞相府啓

何伯深

元戎萬騎星拱轅門清蹕一聲天臨相府協千載明
 良之會應三階平正之期都人踴躍以聳觀書契傳
 聞而未有恭惟 某官國家柱石人物著龜斷朝論
 于片言睦鄰好于兩國係四海安危之重當九重弼
 亮之專澤被生靈功存社稷殫天下之竹帛莫紀元
 功播堂上之韶鈞難形盛德雖蠻貊咸服其忠信願
 草木共^盡識其威名務崇不朽之休宜有非常之錫宸
 衷睠睠每覆燾其^如天廣廈^{潭潭}莫^{潭潭}併^{潭潭}蒙于承^承世恩
 誠渥矣榮莫大焉某厄職海邦親逢盛事莫預具瞻
 之列徒懷喜躍之私

賀丞相賜宅啓

劉子淵

位隆一相長瞻穆穆之清光寵冠三公宜錫潭潭之
 甲第仰認帡幪之大德式昭覆冒之鴻恩眷出宸衷
 驩騰輿論恭惟 某官智周萬物學貫三才高勲銘
 在于鼎彝雅量宏吞于溟渤措邦家于磐石安社稷
 於泰山潤色皇猷主張國計^提斷鼇足以立四極品彙
 更生煉媧石以補蒼穹乾坤再造輿地收還于禹貢
 威儀復見于漢官綽有休聲莫無前比致唐虞之極

治弼諧允賴于臯夔告文武之功成佐佑寔由于周
召某叨持使節祗按海邦徒傾燕厦之私心莫預龍
門之賀客瞻依倍切叙述奚殫

賀張丞相平湖南寇啓

劉林宗

用申伯以柔萬邦昔著周宣之美倚晉公以破三賊
復彰唐憲之勲聿觀今日之元功無若我公之嘉績
爰整其旅清夷千里之波式邁其歸宰正萬機之務
中外所注神人載歡伏惟慶慰恭惟 某官一德享
天孤忠衛上望重璣衡之正謀符著蔡之靈仁也柔
而義也剛綽有中和之氣文足昭而武足畏恢張遠

大之圖屬當荆渚之衝久有漢池之盜仰煩次相出
董銳師既欣康樂之江山一歸節制豈獨淮南之草
木亦識威名運指顧旬日之間致招降五方之衆忠
者懷而畏者服無勞禦寇之兵綏斯來而動斯和誕
布好生之德風濤改色旌燾生輝錫有彫戈人競傳
于振旅袞衣赤舄世切賴于洪鈞行受恩綸永藏盟
府某方勤饋餉喜獲教寧豈特紓鄰路之憂行將慶
中原之復

賀張丞相平寇啓

奏凱旋師奉圭入覲靄萬口同聲之譽被十行細札

之書錦衣繡裳備三公之典冊碧油紅旆瞻上相之
風稜慶在一人重增九鼎恭惟 某官道兼文武身
任安危回日御之再中幹斗樞而獨運已斷蚩尤之
肩臂請梟袁尚之頭顱思定中原誓平北寇奮身犯
難櫛風沐雨者五年決勝運籌折馘執俘者萬計張
尚父鷹揚之氣挫敵人虎噬之心若堂上之兵不嬰
其鋒則閔中之利已非我有顧猛虎在山之若此乃
飛鴻遵渚之謂何爰命召公尚期疆理于南海降于
伊尹又約左右于商王某夙倚門墻晚蒙陶冶假以
兩路召軍之檄脫其一家垂死之軀豈期流落之餘

生復聽遙歸之新詠屬以深居岩壑自遠光塵馮謖
之出無車原憲之貧見時蹇驢肯借尚吝于東家稚
子候歸更迷于前路用莫趨于台席結轉激於蓬心
遐睇海鶴之姿共覩風雲之會衛武公入相曾無菜
竹之篇仲山甫永懷但誦清風之句

賀沈帥平海寇啓

劉林宗

遣將受成選徒薄伐先聲所被肅靜觀貔虎之威羣醜
自携即正鯨鯢之戮神靈慰悅民吏懽呼竊以宣力
四方式重藩維之寄折衝千里欲觀帷幄之謀不有
雋功孰明妙畧執俘折馘有嚴帥聞之尊飲至勞旋

大秩賓筵之禮暑風薰穆氣象清明恭惟 某官才
為時生智因機顯周邦召虎獨高江漢之詩唐室晉
公宜有淮夷之雅昨屬方隅之謀帥寵膺召節以造
朝親奉玉音謂我圖於南土恭承天獎煩君重于淮
陽自紺憶之來臨肅黃堂而共理教條寬簡民俗阜
安乃航海之愚民乘止戈之暇日掠輕舟而及境鼓
惡少以弄兵爰遣偏裨出平兇寇被堅執銳方賈勇
以爭先振旅凱還忽成禽而歸報緬想捷書之上倚
須顯賞之行即奉明綸進持從橐非敢為佞也斯拱
而俟之某幸比此備官親聞盛事觀魯侯之在泮既覩
獻功誇公綽於中朝自知增氣

宗本無出首

賀陳憲平寇啓

戴 翼

螭坳錫命龍節陞榮奏捷至三喜悉平於羣醜論功
第一宣峻陟于穹班塗詠交懽臺治愈煥恭惟 某
官精神秋水談笑春風暗合兵書料賊無如料敵指
麾介士擒寇而必擒王籌策定于樽俎雍容之間號
令行于賞罰嚴明之際風走十八灘之曉鏡淨潢池
天同一十郡之春鋤耕綠野捷書來上朝論聳聞更
生幾百萬之窮民冕旒喜動接武八十一之元士繡
斧光增第師中之錫未償厥功必席前之問始究所

學外勞如許寧淹原隍之載馳中召沓來行見朝廷
之大用某身拘雷邑心繞霜臺側聆恩褒喜倍倫等
合先馳于慶牘愧邈在于偏陬首用先生作棟梁此
日發西江之軌不以下體采葑菲異時歸東閣之鈞

賀陳丞相從駕回啓

熊子復

伏審扈蹕江畿亟埽穹廬之跡還轅吳會益恢巖廟
之圖折衝已賴于精神厲節方加于體貌當此春陽
之駘蕩諒有神明之護持竊以益贊禹而征苗致兩
階干羽之舞尹相湯而伐夏併三股寶玉之俘惟其
佐有真儒所以動無強敵比屬羶裘之侮肆陪鑿輅

之征圖回皆中于事機宴行遂平于亂畧蘇武王而

肆伐既推尚父之謀震徐方而還歸宜誦太師之烈

恭惟

平章僕射相公

某官才高帝賚望重民瞻四夷掌玩而虜固

在于目中萬卷胸蟠而語寧傳於紙上坐籌漢幄子
房首冠於三人從幸渭橋玄齡親率于六騎兗渠既
殄醜類皆奔乾清坤夷即致中原之定天旋日轉暫
隨大駕之回成此鉅勳歸于真宰某猥馳原隍阻覲
門墻還豐而作周官佇慶三公之拜畫河而為晉土
豈惟十部之降願益展于壯猷用永扶于丕緒

賀秦少傅拜埽啓

熊子復

伏以袞衣繡裳入視台堦之峻路車乘馬出游天塹
之雄暫除隅座之雲屏真見還鄉之畫錦諒惟次舍
必有護持恭惟 提省大觀文少傅德嗣格天功叅
播物美由世濟漢相特盛于韋平傑本地靈岳神開
鍾于申甫眷異代帝王之宅乃元台父母之邦乾轉
坤旋踵山東之多相龍蟠虎踞控江左之上游謁告
言歸承恩拜埽昔相如乘使者之傳而返蜀縣令迎
而先驅買臣懷太守之章而還吳郡吏驚而出拜矧
由宰路暫省舊邦是宜列辟祖道之多諸侯迎候之
遠上恩給千騎榮自耀於三時高義散百金澤遂均

于九族古今創見遠近聳聞勝伯禽封魯之時止拜
於後類山甫徂齊之日即遄其歸某遠拘馳傳之行
莫展望塵之拜春華韶潤夏篆安徐願覽秀于山川
選秉均于廊廟

賀秦少傅拜埽啓

熊子復

伏以肅乘孤篆祗掃祖塋戲斑衣而奉二親少輟庭
闈之樂賜錦袍而給千騎蔚為道路之光威容纔出
于日畿爽氣預回于天塹時方春物之駘蕩動有神
明之護持恭惟 提省大觀文少傅望峻三堦勲彌
九鉉自益至賢而作相乃家慶之流傳生甫及申而

有神本地靈之秀發貳槐庭而多暇眷梓里以言旋
鳳翥鸞翔侈皇恩於寶軸龍盤虎踞覽王氣于雄都
紆命袞而拜丘園揮賜金而分宗族散宜生之迪教
國人暫見于往來仲山甫之遄歸王命仍須於出納
某猥縻外計莫備先驅八葉方來已驗青鳥之相六
飛親出更看白馬之迎騎火宵紅錦衣晝耀願精調
於公餽用益副于民瞻

賀叙復得宰啓

朱子真

近蠲藥石復蒞絃歌羣疑果亡清譽益著欽以 某
官奮身孤苦挺節端方未嘗枉尺而直尋不欲曲學

而阿世綵衣蘭膳歎胡廣之無違白髮青衫惜馮唐
之已老比捧毛生之檄來鳴子賤之琴志在澄清俗
有熙熙之樂事輕矯飾躬無赫赫之名拙微効于安
仁蚩頗興于卓茂果招貝錦輒撓汪陂方市虎之可
疑殆樊蠅之遂入然流言固止于智而膚翹豈行於
明旋聞核寔之祥詳悉辨鑿空之妄玉雖磨而非磷金
在鍊而愈精即墨之毀既消齊封可待中年之化不
謬漢掾徒歸吏民悅以承風父老感而相賀獨慙么
陋素忝過從曾微引手之勞少解拾塵之謗喜而不
寐空懷孟子之心名以益聞顧乏曹丘之力貶損威

重亟相緘題禮踰分以非宜詞過情而為愧因人成
事敢貪毛遂之勲反國非功願息屠羊之賞方如簧
之既露諒匪石以彌堅何病不容為善最樂尚幾御
時之令益安事道之誠庶蘭畹以滋芳俾萱堂而底
豫

己巳三月初一日校畢

聖宋名賢五百家播芳大全文粹卷二十七終